

# Bbaluwa y'okudubha eghi Peetelo Aahandiikiye Kwanjula

Mukwenda Peetelo akahandiikila bbaluwa eni Bakilisitaayo abaabaagha mu ehanga eli endindi bakughilaghamu Butulukji. Akabahandiikila kubagumiya nanga baababona-boniyagha haabwa kuhikilija kwabo.

Abaasukiiye ati Yesu naye akabona-bona kandi baamutwalikaniya kubhi mu bwomiji buwe muni muni. Bakilisitaayo nabo babhonganuwe kumanya ngu nabo bakubona-bona dhe.

Abahaaye kunihila mu bilo by'omu maaso. Aabooleka ati Luhanga akwete kukoleesiya kubona-bona kwabo kubafoola bantu be baa mbaghanja. Luhanga akubaha migisa ekaniye. Nahabweki Peetelo eekambiisiya Bakilisitaayo ati baakale mbeetwalikaniya nga bantu baa Luhanga.

<sup>1</sup> Siye Peetelo, oghu Yesu Kilisito aakomiye kuba mukwenda wee, niisiye naahandiikila bbaluwa eni enuwe bahikilija baa Yesu boona. Enuwe aba Luhanga eenini aakomiyemu kuba bantu be. Enuwe abaalughangaan'o mu tauni y'ewaanu, mwaluka, mwalalangila mu maatauni ghanji nga: Ya Ponto, banji ya Galatiya, banji ya Kapadokiya, banji ya Asiya na banji ya Bbitiniya. <sup>2</sup> Luhanga Esetuwe niye eenini

akakoma enuwe bahikilija hambele kusighikila mu kubala kuwe, Mwoyo Ahikiliye aabafoola bahikiliye. Ekyalughiyemu mwahutiya Yesu Kilisito, ti saghama yee yaabanaabiy'o bibhi byanu. Luhanga abaghilile ngughuma kandi abahe mpempa yonkaha.

<sup>3</sup> Luhanga Ese Mukama waatu Yesu Kilisito asijimuwe. Nanga niye akatughilila ngughuma sikanaye aatuha bwomili butahuw'o. Haabwa eye kuhumbuula Yesu oghu tukuhikilijagha naatu endindi tukimaniye kimui ngoku tulihumbuuka. <sup>4</sup> Kintu kinji eki tuli na kunihila ni ngu, tulitunga bugwetuwa obu Luhanga abiikiye bantu be, obutalihuw'o kandi obutalibhiya bwile bwona, obu abiikiye enuwe bahikilija endindi mu eghulu. <sup>5</sup> Ti haabwa kwesigha Luhanga, eye mu butoki buwe akuukala anatulindiye mu kubona-bona kuni kwona kuhikiya haa kilo kya mpelo obu akutujuna kulugha mu butoki bwa Sitaani. Ti Luhanga alitujuna bbeni-bbeni bantu boona baboone. <sup>6</sup> Nankabha endindi mukwete kubona-bona mu milingo ekaniye haabwa kuhikilija kwanu, mudheedhuwe nanga kubona-bona oku ni kwa bwile bukee. Bhaatu mu bwile obukwisa mukudheedheluwa kimui haabwa migisa eghi Luhanga akubaha. <sup>7</sup> Kubona-bona okukwete kubab'o oku kwona, Luhanga niibuwo aabalengesa kulola mulakaba majima muhikilije kwonini Yesu. Nanga kuhikilija kwanu kusaaye feeja eghi bantu bakughilagha bati eli na mughaso munu. Ti nimwakaaye munoolekiye ngoku muhikilije kwonini Yesu mu

kubona-bona oku kwona, Luhanga akubasinda kandi abahutiye haa kilo eki alileka Yesu Kilisito akuukilemu muni muni. <sup>8</sup> Nankabha enuwe mutaaboone Yesu, mumukundiye. Ti nankabha endindi mutamuboone, mumuhikiliye na kudheedhuwa kukaniye, <sup>9</sup> nanga mumanieye ngu haabwa kuhikilija Yesu, Luhanga alibajuna kifubilo kya bibhi byanu.

<sup>10</sup> Kujunuwa kifubilo kya Luhanga oku, niikuwo balangi b'ambele baabalagha kumanyila kimui. Baalanga ngoku Luhanga akubajuna enuwe haabwa ngughuma siye, nankabha mbeebuuliyagha munu eki kujunuwa oku kukumaniisiya. <sup>11</sup> Baalengagh'o kumanya eki Mwoyo wa Kilisito oghu aalekagha balanga aabughagh'o obu aasanguuwe abaghambiiye ngoku Kilisito akubona-bona kandi haanuma abe na kitinisa kyamaani. Baasweka mbeebuuliyagha oghu ebi bikub'o kandi na bwile obu bikumub'o. <sup>12</sup> Luhanga niye akaleka balangi aba baamanya ngoku ebi baalangagha ebi bitaakub'o kughasila balangi aba bonkaha, bhaatu bilib'o myaka ekaniye haanuma ya balangi aba kughasila naatu bahikilija. Ti endindi aba Luhanga aahaaye maani ghaa Mwoyo Ahikiliye kulugha mu eghulu niibuwo baabalangilila kukwama mu kutebeja Makulu Ghasemeeye ghaa Yesu Kilisito. Kandi na baamalajika baa Luhanga mu eghulu niibuwo baanabbala kumanya haa majima ghaa ngoku Luhanga akutujunagha kifubilo kya bibhi byatu.

*Kuba bahikiliye*

13 Nahabweki mweteekanije mu kwelilikana kwanu haa bya Yesu, niikuwo mukole ebi Luhanga abbaliye. Muukale mwelindiye kutasijisa, niikuwo muukale munanihiye kwonini ngoku Luhanga alibaghilila ngughuma siye haa kilo eki Yesu Kilisito alikuukilamu muni muni. 14 Ngoku tuli baana baa Luhanga haabwa kuhikilija Yesu, tubhonganuuwe kuukala ntunakola ebi abbaliye. Tatubhonganuuwe kuukala ntunakola bintu bimbiihiye ebi twakolagha tutakamaniye njegheesiya yamajima ya Luhanga. 15 Nahabweki ngoku Luhanga oghu akaleka mwaba bantu be ahikiliiye, naanu dheer mukulaghiluwa kuba bahikiliiye mu byona ebi mukukola, 16 nanga kihandiikuuwe mu Byahandiikuuwe ngu Luhanga aaghila ati, "Mukulaghiluwa kuba bahikiliiye nanga nanje nihikiliiye."\*

17 Ti muusuke ngu Luhanga Esetuwe w'omu eghulu oghu tukusabagha kutukoonela, taakusoloolagha mu kutwila bantu musango ghwa bibhi byabo bbaa. Akutwila enuwe musango kedha abahe migisa kusighikila mu ebi mukukolagha. Nahabweki mukulaghiluwa kumuhutiya munali muni muni eghi etali yaatu bahikilija baa Yesu, hambali tukuukala bwile bukee, eyaatu eli mu eghulu. 18 Mumaniiye ngoku Luhanga aahaayeyo nsasuli ya kutucungula kulugha mu bwomiji bwakitiyo-kitiyo obu twagweteewe hambele kulugha mu baataata baatu.

---

\* 1:16 1:16 Kyabaleevi 11:44, 45; 19:2; 20:7

Ti nsasuli eghi tayaabaaye ya bintu nga feeja ebikuhuw’o bwile bwona bbaa. <sup>19</sup> Akatucungula naakoleesiya saghama ya Kilisito ya muhendo ghwamaani, Kyana kya Ntaama oghu ataasiisiye. <sup>20</sup> Ti na nsi etakabaay’o Luhanga akasanguwa ateekanije hambele ngoku Kilisito akutujuna kifubilo kya bibhi byatu. Ti bwile buni akaboneka niikuwo agubhe kutucungula. <sup>21</sup> Kandi haabwa Kilisito kutukwila haa musalaba na haabwa kuhumbuuka kuwe, niikiyo kilekiye etuwe bahikilija twesighiye Luhanga. Tooli haabwa Luhanga kuhumbuula Kilisito oghu mu bakuuye kandi kumuhutiya, niikiyo kilekiye kuhikilija kwatu tukuteeleeye kimui mu Luhanga.

<sup>22</sup> Ngoku mwamaliye kweliya mwoyo yaanu haabwa kukwata njegheesiya yamajima, kandi mwakundangana nga bahikilija, mwekambile kimui kukundangana muuhiiye haa mitima yaanu. <sup>23</sup> Enuwe mukamala kubyaluwa buhyaka, tamwabyauwe kulugha mu nsigho eghi ekuhuw’o, bhaatu mukalugha mu nsigho eghi etaakuhuw’o kukwama mu kighambo kya Luhanga kyomiji kandi ekitaakuwaagh’o. <sup>24</sup> Nanga haliyo hambali kighambo kya Luhanga kihandijikuwe ekighiliye kiti,

“Bwomiji bwa muntu buli nga bisingo,  
nanga buliyo haabwa bwile bukee.

Bulungi buwe bukuhuwaagh’o bwangu  
nga byakiyo bya kimole.

Kimole kikakuwaagha na byakiyo  
bikuwaagha,

25 bhaatu kighambo kya Mukama kikuukalagh'o bilo n'ebilo.”\*

Ti kighambo eki niigho Makulu Ghasemeeye agha baabatebiije.

## 2

<sup>1</sup> Nahabweki ngoku enuwe muli bantu bahyaka haabwa kuhikilija Kilisito, muleke kukola bikoluwa byona ebibhiihiye kandi kuha bisubha. Kukwamilila kwanu Luhanga kubhonganuuwe kuba kwamajima. Kandi tamukulaghiluwa kuba n'etima bbaa, ti mutalihangilila muntu mu mulingo ghwona.

<sup>2</sup> Enuwe bahikilija mubhonganuuwe kuukala nimuughuwa kighambo kya Luhanga kyamajima kubagumiya mu kuhikilija kwanu, ngoku baana nkelembe abakuukalagha bwile bwona mbabbala kwonka mabeele ghasemeeye ghaa baaninabo kubagumiya,

<sup>3</sup> enuwe mukamala kumanya ngoku Mukama waatu Yesu Kilisito aabaghiliye ngughuma.

### *Bahikilija na Numba ya Luhanga yamajima*

<sup>4</sup> Mweyongele kuhikilija Mukama waatu Yesu oghu akuhaagha bantu bwomiiili butahuw'o, niiye ali ng'ebaale lyamaani elikugumiyagha numba eli bakweli baabhengiye, niiye akugubha kugumiya bahikilija ngoku ebaale lyamaani likugumiyagha numba. Bantu bakanije baka-mubhenga, bhaatu Luhanga aamukoma kandi aamufoolela kimui wa mughaso ghwamaani.

---

\* 1:25 1:25 Isaaya 40:6-8

<sup>5</sup> Ngoku bantu bakulabhanganinyagha matafaali\* makwela numba, Luhanga niibuwo aabalunganiya hamui nga kibbula kya bahikilija eki Mwoyo Ahikiliye akuukalamu, niikuwo enuwe mugubhe kuba bahongi be abakumuhongela bihonguwa, kandi niikuwo mugubhe kukola bikoluwa ebidheedhiye Luhanga, haabwa eki Yesu Kilisito aatukoleeye. <sup>6</sup> Nanga Ebyahandiikuwe bighiliye ngu,  
 “Olole, nkuta mu kibugha kya Sayuuni ebaale,  
 ebaale lya mu nsondo elyakomeewe kandi lya muhendo.

Ti weena oghu akumuhikilija, taalihemuka.”\*

<sup>7</sup> Hatiini haabwanu abahikiliye, ebaale eli ndyamughaso. Bhaatu abatahikiliye, niibo Ebyahandiikuwe bikubughagh’o biti,  
 “Ebaale eli bakweli baabhengiye,  
 niiliyo lyahaghikiye numba kusaaliya ghanji ghoona,”\*

<sup>8</sup> kandi,

“Ebaale lyakukobhoka,  
 kandi kibaale kyakubagenga.”\*

Bakukobhokagha nanga bakubhengagha kuhikilija kighambo kya Luhanga kandi batunga eki aabateghekeeye. <sup>9</sup> Bhaatu enuwe muli bantu aba Luhanga aakomiyemu, bahongi baa Mukama waatu Kilisito, bantu baa Luhanga bahikiliye, abakwoleka bantu banji bulungi bwa Luhanga oghu akaaya enuwe mu butamanya bwa kumubhenga, aabaha kyeleli

\* 2:5 2:5 Mu Lugiliki baghambiye bati mabaale. \* 2:6 2:6

Isaaya 28:16 \* 2:7 2:7 Jabbuli 118:22 \* 2:8 2:8 Isaaya 8:14

kya kumumanya. <sup>10</sup> Etuwe bahikilija hambele tukaba tutali mu bumui na Luhanga, bhaatu endindi tuli mu bumui naye kwonini. Hambele tukaba tutamaniye ngoku Luhanga aatughiliye kisa, bhaatu endindi tumaniye kimui ngoku aatughiliye kisa kiye.

<sup>11</sup> Bahikilija baa Yesu baanakyenje aba nkundiye, mumaniiye ngoku nsi eghi tulimu eni ngoku etali ka yaatu yoonini. Tulimu baghenu kwonkaha, ka yaatu yoonini eli mu eghulu. Nahabweki, nkubateelelela nti muleke kutwalilijibuwa munu ebi mibili yaanu ekubbala, nanga ebi bikuleka mutakwamilila kwonini Luhanga. <sup>12</sup> Mukulaghiluwa kukola bikoluwa ebikwoleka ngoku muli bahikiliye, niikuwo bantu abatali bahikilija bagubhe kubona bikoluwa byanu bisemeeye ebi. Nankabha babugha bati niibuwo mwakola bintu bibhijiye, bakubona ngoku mukwete kukola bikoluwa bisemeeye. Ebo balihikilija Luhanga kandi bamuhe kitiinisa haa kilo eki Luhanga aliisa kutughililamu ngughuma.

### *Kuhutiya balem̄i baanu na bantu ababaliyo butoki*

<sup>13</sup> Enuwe bahikilija mukulaghiluwa kuhutiya bilaghilo bya bantu ababalem̄iye munsi muni ebi bataay'ō. Nanga eki niikiyo Mukama waatu Yesu akubbalagha ati tukole. Tukulaghiluwa kuhutiya mulem̄i mukulu w'ehanga lyatu nanga niye ali na butoki haa buli kintu kyona mu ehanga. <sup>14</sup> Luhanga abbaliiye dheer ati tuhutiye bakama abalabhiye mulem̄i oghu, nanga mulem̄i

oghu niiye abahaaye butoki kufubila abakukola bintu bibhiihiye kandi kusinda abakukola bintu bisemeeye. <sup>15</sup> Kighendeleluwa ekilekiye nim-bateelelela ntiyo, ni nanga Luhanga akubbala bantu abatamuhikilije kandi beyeta bagheji, kubona ngoku enuwe bahikilija mukwete kukola bikoluwa bisemeeye. Kandi bikoluwa bisemeeye ebi, bikuleka mbaleka kusoghosa etuwe bahikilija. <sup>16</sup> Nahabweki ngoku Luhanga aamaliye kutuha bughabe bwa kulugha mu kibhi, tuli na kwelinda mu ebi tukukola. Tutakoleesiya bughabe bwatu kubhi kuba kyekwatiisiyo kya kukola bintu bibhiihiye. Nankabha Luhanga atuhaaye bughabe, tunali baheeleliya be kandi anatuloleeye. <sup>17</sup> Enuwe bahikilija muhutiye bantu boona, kandi mukundangane enuwe boona. Muhutiye Luhanga, kandi muhutiye dhe mukama mukulu w'ehanga.

### *Baheeleliya*

<sup>18</sup> Enuwe baheeleliya, mubhonganuuwe kuhutiya bakama baanu. Ti mukolaghe byona ebi balabalaghilagha kukola, etali haa balungi kandi bateekaane bonkaha, bhaatu na basaakaaye dhe. <sup>19</sup> Luhanga akubaha mugisa kaakuba muba baamajima kandi mugumisilija nankabha baba mbababona-boniya mutakoliye kabhi koon. <sup>20</sup> Majima Luhanga taakubaha mugisa ghuwe nimwagumisilije kuhuuluwa haabwa kukola bintu bibhiihiye. Bhaatu mbaababona-boneejiye haabwa kukola ebihikiye kandi mugumisilija, Luhanga akubaha mugisa ghuwe.

21 Mukama waatu Kilisito akabona-bona, bhaatu aagumisilija niikuwo tugubha kutunga bughabe bwa Luhanga kutatuha kifubilo kiye. Ti niiye kyakulolelo mu kubona-bona eki tubhonganuuwe kukwamilila. Luhanga akaleka twahikilija Kilisito ali na kighendeleluwa ati niikuwo naatu tugubhe kubona-bona ngoku Kilisito aabona-boone. 22 “Taaliyo kibhi kyona eki aakoliye, kandi taaliyo kisubha kyona eki aahaaye bbaa.”\* 23 Obu bantu baabhengiye Yesu kandi baamwambula mamubamba haa musalaba, taabakuukiyemu kintu kyona kibhijhiye bbaa. Kandi taabakiiniye. Bhaatu abaamubona-boniyagha aba akabakwatiya Luhanga oghu akutwilagha bantu musango mu majima. 24 Kilisito eenini niiye akatunga kifubilo kya bibhi byatu obu baamubambiye haa musalaba, niikuwo tulekele kimui kibhi, kandi tuukale tuli bahikiliiye. Bibodde biye niibiyo byatukiliiye. 25 Hambele tukaba tuli nga bisolo bibuliye ebitali na muliisiya. Bhaatu endindi twakuukiye ewaa Luhanga oghu akulolelela myoyo yaatu ngoku muliisiya akulolelelaga bisolo biye.

### 3

#### *Bakali na basaasa abaswelangaane*

1 Enuwe bakali bahikilija abasweuwe, ngoku bakoli babhonganuuwe kudhootela ababaliyo na butoki, niikuwo naanu mubhonganuuwe kudhootela b'ebaanuwe. Mubadhotele

\* 2:22 2:22 Isaaya 53:9

niikuwo naabaay' o weena mu b'ebaanuwe oghu atahikilijje butumuwa bwa Kilisito agubhe kumuhikilija, etali haabwanu kumutebeja bhaatu haabwa bikoluwa bisemeeye ebi mukwete kukola, <sup>2</sup> haabwa kubona ngoku mukwete kwetwalikanija kusemeeye kandi muhutiiye Luhanga. <sup>3</sup> Kusemela kwanu kutaba kwa haaguuli ya mibili yaanu kwonkaha, haabwa kubakola esoke kwonkaha, kedha kuluwala bukwanji busemeleeye kimui, kedha kuluwala ngoye sitembeeye kimui. <sup>4</sup> Bhaatu kusemela kwanu kube kwa haa mutima. Mube bantu abakubugha n'elaka liheheeye, kandi abakukola bikoluwa abikuleeta mpempa yonkaha, kusemela ng'oku takukuhuwaagh' o bbaa, kandi ni kwamuhendo munu ewaa Luhanga. <sup>5</sup> Hambele bakali bahikilijje, abeesighiye Luhanga niikuwo baabaaye batiyo balungi. Bakadhootela beebabo. <sup>6</sup> Kyakulolelo, Saala akadhootela ebawee Ebbulahimu kandi aamughilamu mukama wee. Naanu mukuba ng'oghu oti muli bahala baa Saala nimwakoliye bikoluwa ebihikiye kandi tamukwobaha kantu koonaa bbaa.

<sup>7</sup> Ti enuwe bahikilija basaasa abasweye, muhutiiye kandi muloleelele kulungi bakali baanu. Nankabha ebo baba batali baamaanj munu ng'atu basaasa. Kandi mumanye dheer ngu nabo Luhanga akubaha ngughuma sya kutunga kisémbó kya bwomiji butahuw' o ngoku akukiha etuwe basaasa. Tubhonganuuwe kubahutiya niikuwo Luhanga aaghuwe nsaala syatu tukumusaba.

<sup>8</sup> Eki nkubbala kughambila enuwe bahikilija boona niikiyo kini: Mubhonganuuwe kuukala mu bumui nga bahikilija. Buli muhikilija atwalikanaye muunakiye kusemeeye, kandi mughililane kisa, nanga muli nga baanina emui. Mubhonganuuwe kuba benge, kandi mubhonganuuwe kuteebhimba-bhimbija.

<sup>9</sup> Muntu naakukoliye kubhi, uwe otamukola kubhi. Ti muntu naakwambuuye uwe otamwambula, kyonkaha omukole kulungi. Eki niikiyo kyalekiye Luhanga aabafoola bahikilija ati niikuwo agubhe kubaha mugisa haabwa kukola otiyo. <sup>10</sup> Nanga Ebyahandiikuuwe bikughilagha biti,

“Weena oghu abbaliye kuukala adheedheeuwe kandi ali kusemeeye munsi muni, abhonganuuwe kwelinda kanuwa ke kutabugh’o bantu bintu bibhiihiye, kandi kutaha bisubha.

<sup>11</sup> Abhonganuuwe kuleka kukol’o baanakiye bintu bibhiihiye, bhaatu akole biseemeeye. Akulaghiluwa kuukala mu businge na bantu banji boona.

<sup>12</sup> Nanga Mukama akuukalagha ataaye maaso ghe haa bahikiliiye be, kandi matui ghe ghakuughuwagha nsaala syabo,

bhaatu oohiye abakukolagha bibhiihiye.”\*

*Kubona-bona haabwa kukola bikoluwa bise-meeye*

---

\* 3:12 3:12 Jabbuli 34:12-16

13 Nimwakaaye nimunakola bikoluwa bise-meeye, taaliyo oghu akubakola kubhi bbaa. 14 Ti nankabha bantu bababona-boniya haabwa kukola bikoluwa bya buhikiliye, Luhanga alibaha mugisa. “Ti bantu aba mutaboobaha kandi mitima yaanu etatuntula.”\* 15 Bhaatu muhutiyiye Kilisito kandi muukale mumumaniye nga Mukama waanu. Kandi muukalaghe mwe-teekanije kusoboolola kulungi weena oghu akubabuuliya haa kunihila oku muli nakuwo. 16 Mubhonganuuwe kubakuukamu muheheeye kandi mubahutiye, muli na mitima esemeeye, niikuwo abakubugh’o kubhi ngeso syanu sise-meeye mu Kilisito, bahemuke. 17 Muusuke ngu nkilungi etuwe bahikilija kubona-bona haabwa kukola bintu bise-meeye, kaakuba Luhanga ab-bala ati tubona-bone, etali kubona-bona haabwa kukola bintu bjhijhiye.

18 Naabughiye eki nanga Kilisito akakuwa mulundi ghumui haabwa basiisi, kandi taatodhiye kukuwa. Akaba ali muntu ahikiliye, bhaatu aakuwa haabwa bantu abatahikiliye. Akakuwa niikuwo agubhe kutukukanganjyamu na Luhanga. Eye obu aabaagha muni bantu bakamwita, bhaatu mwoyo ghuwe ghwakala ghunali ghwomiji. 19 Mwoyo oghu ghwaghenda ghwalangilila businguli bwa Luhanga mu mwoyo ya bantu babhi abaakuuye, eghi Luhanga aali abohiye mu nkomo mu kijikalo kya bakuuye. 20 Bantu aba ni hambele abaabhengiye kuughuwa Luhanga bwile obu eye aabaagha

---

\* 3:14 3:14 Isaaya 8:12

anagumisi*li*ije bikoluwa bi*bhi*hiye bya bantu kuhikiya bwile obu Nuha aamaliyemu kukola bwati buunamulito. Ti bantu munaanaa bonkaha niibo baaniye mu bwati obu kandi baajunuwa kukwila mu kutungeela kwamaani kwa maasi okwabaayo. <sup>21</sup> Maasi aghabaayo agha, mu bwile obu Nuha n'abaa ka yee baabaagh'o, kiswaane na kubatiijibuwa bilo bini. Kubatiijibuwa oku kukwolekagha ngoku Luhanga akugubha kuha bantu bughabe kulugha mu kifubilo kiye. Tiini endindi kubatiijibuwa na maasi taaniikuwo kukutujuna bibhi bbaa. Bhaatu tukubaagha ntwesengeleliya Luhanga kuteekaaniya byelilikano byatu. Luhanga akugubha kutuuy'o biyo haabwa kwesigha Yesu Kilisito oghu aahumbuuye. <sup>22</sup> Kilisito akanina mu eghulu, ti endindi asitamaye haa luhande lwa mukono ghwabuliyo ghwa Luhanga hambali alemiye baamalajika na baa butoki na baamaani boona.

## 4

### *Kuukal'o haabwa Luhanga*

<sup>1</sup> Nahabweki ngoku Kilisito aaboona-boone obu aanabaagha muni muni, naanu dheeh bahikilija be mubhonganuuwe kuukala mweteekaniije kubona-bona ngoku naye aaboona-boone. Nanga nimwatuyemu kubona-bona haabwa kuhikilija Kilisito, kikumaniisiya ngu mukatuwamu kuleka kusisa ngoku mwasisagha. <sup>2</sup> Ekyalughiyemu mwaleka kumalila bwile bwana bwona muni muni nimutwalilijibuwa kukola bintu bihihiye ebi

bantu basiisi bakubbalagha kuukala mbakola. Bhaatu bwile bwona mukubbalagha kuukala nimukola ebi Luhanga abbaliye. <sup>3</sup> Nanga tamubhonganuuwe kutodha kuukala nimukola bintu bi**bhiihiye** ebi bantu abatamaniye Luhanga bakubbalagha kuukala mbakola; nga busyani, kweghomba kukola bintu bi**bhiihiye**, tamiilo, kughenda mu maghenu ghatasemeeye na kulamiya bisani bantu beekoleeye. <sup>4</sup> Majima abaabaagha baabhootu syanu abatahikilije Yesu, baswekiye kubona ngu enuwe tamukyaghenda nabo kukola bintu bi**bhiihiye** ebi mwakolagha. Kandi eki niikiyo kilekiye mbababugh'o bintu bi**bhiihiye**. <sup>5</sup> Bhaatu muusuke ngu kilo kimui Luhanga alitonganiya abakukolagha bintu bi**bhiihiye** aba, abanakaaye endindi n'abakuuye, kutwila musango. <sup>6</sup> Nahabweki eki niikiyo kyalekiye Makulu Ghasemeeye ghaa Luhanga baaghatebeja n'abaakuuye, niikuwo myoyo yabo egubhe kuukala enali na bwomiji ngoku Luhanga ali mwomiji. Nankabha Luhanga naabahaaye kifubilo eki akuhaagha buli muntu.

<sup>7</sup> Bwile bwa bintu byona ebili muni kuhuw'o buli haai kuhika, nahabweki ndimabateelelela nti mugume mu kuhikilija kwanu, kandi mwelinde kutasija, niikuwo mugubhe kusaba Luhanga kusemeeye. <sup>8</sup> Ti kusaaliya byona mukundanganilane kimui nga bahikilija. Nanga nimwakundangaane kwonini kikubadhootela kughanilangana bibhi byanu. <sup>9</sup> Mubhasilangane nga bahikilija. <sup>10</sup> Ti buli omui kitembo eki Luhanga aamuhaaye akikoleesiye kukoonela

baanakiye nga muheeleliya mulungi, nanga Luhanga mu kisa kiye akabaha bisembo ebitasusaane. <sup>11</sup> Kandi muhikilija weena oghu Luhanga ahaaye kisémbó kya kutebeja, abhonganuuwe kutebeja mu mulingo ghwikiiye kimui, ng'oghu oti Luhanga eenini niiye akwete kutebeja. Oghu Luhanga ahaaye kisémbó kya kukoonela baanakiye, ataabululuwa ngu ebi akwete kukoleesiya kukoonela baanakiye ebi, Luhanga niiye amuhaaye biyo. Ti akikolele kimui na maani ghoona agha Luhanga amuhaaye. Niikuwo bantu bagubhe kuhutiya Luhanga haabwa eki Yesu Kilisito aakoliye. Luhanga abe na butoki kandi na kitinisa bilo n'ebilo. Aamijina.

### *Kubona-bona haabwa kuba bahikilija*

<sup>12</sup> Bahikilija baanakyenje aba nkundiye, kulengeesebuwa kwamaani oku muli nakuwo endindi, kutabatuntuliya ng'oghu oti bintu bya mbaghanija ebitakabaagh'o bantu niibiyo bikwete kubab'o. <sup>13</sup> Bhaatu mudheedheluwe kimui nanga bilengeso ebi bikubafoola bantu aboolekiye ngoku mulungaane kwonini na Kilisito mu kubona-bona kuwe muni muni, nanga haanuma ya kubona-bona oku, obu Kilisito alikuuka mulidheedheluwe hamui naye mu kitinisa kiye. <sup>14</sup> Bantu mbabambuuye haabwa kuba bahikilija baa Kilisito, enuwe muli na mugisa, nanga eki kikuba nkyoleka ngoku Mwoyo wa kitinisa wa Luhanga abaliyo. <sup>15</sup> Bhaatu tamubhonganuuwe kubona-bona haabwa kuba bajindi, basuma, kedha haabwa

kukola kintu kyona kibhijhiye, kedha haabwa kwetaahiya mu bitabakwet’o. <sup>16</sup> Bhaatu

nimwabaaye nimubona-bona haabwa kuba bakilisitaayo, mutaaghuwa muhemukiye haabwa eki. Ti musinde Luhanga haabwa kubona-bona nanga enuwe kuba Bakilisitaayo.

<sup>17</sup> Naabughiye eki nanga bwile bwa Luhanga kutwila bantu musango buli haai kuhika, ti etuwe bahikilija nituwe akutandikil’o kutwila musango. Nahabweki ngoku alidubha kutwila etuwe bahikilija musango, kutwila musango bantu abataakuhikilija Makulu Ghasemeeye ghaa Luhanga kuliba kwa kabhi kwonini.

<sup>18</sup> Kihandjikuwe ngu,

“Buuye obu kilaba kitimbiikaane bahikiliiye kujunuwa,

ti ababhengiye Luhanga na basiisi baliba batiya?”\*

<sup>19</sup> Nahabweki, nimwabaaye nimubona-bona kusighikila ngoku ntegheka ya Luhanga eli, mweyongele kukola ebihikiye, kandi mwesighe Luhanga oghu akabahanga, nanga eye taakuleka nimusaaghuwa kukola ebihikiye bbaa.

## 5

### *Beebembeli baa bahikilija na batabhana*

<sup>1</sup> Nahabweki enuwe beebembeli abebembeeye bibbula bya bahikilija, siye nga mwebembeli muunakyanu, kandi oghu akabona kwonini ngoku Kilisito aabona-boone, kandi oghu nimanije ngoku ndiba hamui naye mu

---

\* 4:18 4:18 Nsjmo 11:31

kijikalo kya kitinisa obu alikuuka. <sup>2</sup> Eki ndimabeesengeleliya kukola ni nti, muloleelele kusemeeye bahikilija baa Yesu, aba Luhanga aabahaaye kuloleelela. Mutaba nga bantu aba bahambilijije kubaloleelela, bhaatu abeehaayeyo enuwe boonini kukikola ngoku Luhanga abbaliye ati mube. Ti kighendeleluwa kyanu kubaloleelela takibhonganuuwe kuba haabwa kubala enuwe kusasuluwa kusaalukaane kwonkaha, bhaatu kibe haabwa kubala kubakoonela. <sup>3</sup> Mutahingulanija kwefoola bangbongbou baa bahikilija aba Luhanga abahaaye kuloleelela, bhaatu mube kyakulolel'o kyabo mu kukola bikoluwa bisemeeye niikuwo nabo babeeghel'o. <sup>4</sup> Nimwakoliye mutiyo, obu muloleeleli waatu mukulu Yesu aliisa, aliha buli omui bukulu bwa kuukala naye mu kitinisa kiye ekitalihuw'o.

<sup>5</sup> Enuwe batabhana na beesiki bahikilija, ngoku musaasa na mukali abaswelangaane babhonganuuwe kudhootelangana, niikuwo naanu mubhonganuuwe kudhootela beebembeli baa bibbula byanu bya bahikilija. Ti enuwe bahikilija boona, mubhonganuuwe kudhootelangana, nanga Ebyahandiikuuwe bikughilagha biti, "Luhanga akuhakaniyagha abali na myepanko, bhaatu aghilila ngughuma abadhootiye."\*

<sup>6</sup> Nahabweki mwebundaaliye, musijime butoki bwa Luhanga kubalema, niikuwo bwile mbwahikiye, abahutiye. <sup>7</sup> Ti bijibu byanu byona ebi muli nabiyo mubikwatiye Luhanga, nanga niye abaloleleeye mu buli kimui kyona.

---

\* 5:5 5:5 Nsjimo 3:34

8 Muukale mwelindiye kandi mweteekaniije, nanga ngighu yaanu Sitaani niibuwo aabasaalilamu nga ntale ekugboma, neebala muntu oghu ekwita kandi kuliya. 9 Mweyongelele kimui kugumila mu kuhikilija kwanu kandi mubhenge Sitaani oghu, muusuke ngu bahikilija baanyakyanu baa mumsi yoona bakwete kubona-bona ngoku naanu mukwete kubabona-bona mutiyo.

10 Kandi haanuma ya kubona-bona haabwa bwile bukee, Luhanga oghu ali na ngughuma syona, oghu akababilikila kughabana kitinisa kiye kitahuw'o mu Kilisito, niye eenini alibahuumujiya, abagumiye, kandi abongele maani. 11 Luhanga oghu aleme na butoki bwona bilo n'ebilo. Aamijina.

### *Kulagha*

12 Silaasi muhikilija kwonini muunakyatu, niye ankooneeye mu kubahandiikila bbaluwa nabwana eni. Nkubbala kubateelelela kandi kubagumiya nti butumuwa obuli mu bbaluwa eni bubughiy'o ngughuma sya Luhanga aatughiliye esi tutaali tubhonganuuwe kutunga. Mweyongelele kimui kuhikilija butumuwa obu. 13 Bahikilija baa Yesu abali nanje eni, mu kibugha kya Bbabbulooni,\* aba Luhanga aakomiye kuba bantu be ngoku naanu aabakomiye, mbabakeeliya. Na muhikilija Maliko oghu ali nga mwana wanje eenini haabwa kuhikilija kwonini Yesu

---

\* 5:13 5:13 Hani Peetelo aamanisjyagha kibugha kya Looma, bhaatu taabbaliye kukyatula.

naabakeeliya dhee. 14 Ti enuwe bahikilija  
mulamukanganiyaghe nimughuwana mu  
kikubha kwoleka ngoku mukundangaane.  
Enuwe boona abahikilije Kilisito, Luhanga  
abaghilile mpempa yonkaha.

**Ndaghaano Mpyaka Mu Lubwisi**  
**Talinga-Bwisi: Ndaghaano Mpyaka Mu Lubwisi**  
**(Bible)**

copyright © 2019 Wycliffe Bible Translators, Inc.

Language: (Talinga-Bwisi)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Feb 2024 from source  
files dated 29 Jan 2022

928c080e-d746-567f-a478-b44698424e44